

INSULÆ S. MARTINI ET OLERON.

tis hoc effecit, ut frater D. Thorax vulneratus obierit, & cum eo è gregariis viginti quinque. Invalescens intra arcem fame ob cibi inopiam, rerum quæ ad victum spectabant præcia in immensum excrevere. Et grassans diarrhæa dimidiam fere exercitus Anglicani partem consumpsit. Interea favente vento quindecim myoparones arcem subiere, & à commeatu obsessis prospexere, damnantibus negligentiam Anglorum Batavis, qui istuc erant. Angli, ne idem postmodum accideret, molem ligneam ex arboribus catenatim coherentibus portui objecere, sed hanc aquarum & ventorum vis disjecit. Tandem confugere ad eas artes quibus aliquando usus fuit in obsidione Gertrudisbergæ Illustrissimus Princeps Mauritius. Nempe navigia minora lunata forma disposita aditum Gallis præcludere. Cum autem recepto intra arcem commeatu animi crescerent obsessis, de discessu cogitare cœperunt Britanni. Quumque in insulam appulissent quatuor aut quinque Gallorum millia, decretum inter Anglos insula re infecta discedere. In postremos impetum facere Galli, quingentis aut sexcentis cæsis. Angli

adversis etiam tempestatibus jactati in Angliam reversi sunt, desideratis è suorum numero tribus millibus. Hac victoria erectiores Galli non leviter Anglis insultarunt, ignaviam, rei militaris imperitiam, aliaque fortissimo aliàs & pugnaci satis populo exprobrantes.

Vliarus insula, vulgo Oleron, insula omnium rerum feracissima & fertilissima est parens. ambitus ejus septem milliaribus circumscribitur. sub ditione est Pontianorum. Cumque Broagium sibi alendo minime sufficiat, ex hac annona & quæ ad victum necessaria sunt, eò comportantur. Plinius Vliarum vocat. Abest à Broagio secundo vento duabus horis aut circiter, castro natura loci egregie munito, Canonicorum collegio & Franciscanorum conspicua: parochiis sex, & opimo Benedictinorum cœnobio distincta est. Frumenti, vini, salisque in hac insula tanta copia est, ut nihil ad vitæ hujus usum desiderari possit, aditumque satis facilem habet. Hinc in Belgium & vicinas regiones magna salis vis navibus transportatur. Pagos habet S. Andreæ, S. Vrgentii, S. Petri, S. Georgii, & S. Dionysii.

